

lis Gnovis

■ UDIN. Messe par furlan

A Udin, la Messe par furlan e ven cjantade sabide ai 4 di Mai aes 5 e mieze sore sere, li de capele «de Purità», daprûf dal domo (cun Radio Spazio che le trasmet sul moment). Al cjantarà messe pre Christian Marchica. E compagnarà la celebrazion la Corâl Cjasarsese di Cjasarse.

■ ARLEF. Alfabet furlan e Mape dal Friûl par dutis lis primariis

Intai dis passâts i gnûfs posters educatîfs de ARLeF-Agjenzie regionâl pe lenghe furlane a son stâts dâts fûr a passe 600 classis de scuele de infanzie e a 1.250 classis de primarie. Lis scuelis de infanzie a àn vût il poster «La mè zornade», che al jude i fruts a tignî a mens lis ativitâts di ogni dì e i moments impuartants de zornade tant che fâ di gulizion, gustâ, lavâsi i dincj e tant altri. L'Alfabet de lenghe furlane, invezi, al vignarà doprât tes aulis des classis 1e e 2e de primarie e al judarà i piçui a imparà a lei e a scrivi l'alfabet e i digrams de lenghe furlane. Chei un pôc plui grancj, che a frecuentin za la 3e, 4e e 5e de scuele primarie, a podaran zovâsi dal poster «Friûl», cuntune mape par imparà i confins dal Friûl, trop che al è grant, lis citâts plui impuartantis e i cinc sîts dal Patrimoni mondiâl Unesco. In maniere simboliche, il president de ARLeF, Eros Cisilino, al à consegnât di persone i materiâi al Istitût Comprensif di Tressin. A jerin presints i arlêfs de prime e de cuinte de scuele primarie, adun cu lis lôr insegnantis di lenghe furlane Sonia Cargnelutti e Anna Zossi.

Miercus 1	S. Josef artisan	Domenie 5	VI Domenie di Pasche
Joibe 2	S. Atanasi v.	Lunis 6	S. ts Marian e Jacum m.
Vinars 3	S. ts Filip e Jacum	Martars 7	S. te Flavie m.
Sabide 4	S. Florean m.	Il timp	Bielis zornadis



Il soreli
Ai 1 al jeve aes 5.53
e al va a mont aes 20.16.



La lune
Ai prins ultin cuart.

Il proverbi
Cui che al à pioris,
al à ançe piels.
Lis voris dal mês
Se o stin fasint un bon lavôr,
il nestri ort al varès
di jessi une vore biel, in salût e siôr di plantis.

1864: i mots di Navarons

Finide la Seconde vuere di Indipendence, muart Cavour e daspò che la capitâl de Italie e jere stade puartade di Turin a Rome, par completâ la unitât dal País al coventave di liberâ il Venit, il Trentin e il Friûl dai Austriacs, magari cuntune insurezion, cemût che al sperave Mazzini, e forsît ançe il Re. Ma nuie ce fâ, parcè che la France e veve fat savè che la robe no jere di so agradiment. Propit daûr di chel sium al nassè, in Friûl, un tentatîf di insurezion, promovût di un miedi di Midun, Antonio Andreuzzi, un dai compagns plui fidâts di Mazzini, che lu clamave con gradi, e di altris siei amis. Andreuzzi, patriote e mazzinian fin dai tîmps de Universitât a Padue, al veve puartadis lis sôs ideis in Friûl, e massime tal piçul borc di Navarons di Midun, dulà che al jere a stâ, daspò di vè partecipât ae Prime vuere di Indipendence. In chest so tentatîf di insurezion al cjapà dentri so fi Silvio, l'avocat udinês Giovanni Battista Cella, l'insegnâr Francesco Tolazzi di Mueç, Marziano Ciotti e altris di lôr. Al è ai 16 di Otubar dal 1864 cuant che il miedi, cuntune cincuantine di lôr, al partis di Navarons e daspò di cualchi incursion a Spilimberc e a Manià, si puarte, cu la bande, a Tramonts di Sore: al è l'inizi de insurezion furlane cuintri dai Austriacs, che e finirà ai 8 di Novembar, pôc daspò di jessi scomençade. Rivade là sù, la bande di Andreuzzi e larà indevant a movisi su lis monts dulintor Midun,

anche parcè che il tentatîf di rivâ fin a Dimpeç al murarà prin di nassi, vignûts a savè che il puest al jere ben presidiât dai gjendarmis austriacs. Prime di rivâ, ai 27 di Otubar, tal landri de mont Cjstiel parsore Andreis, li che il numar dai partecipants al tentatîf al le in mancûl, parcè che cualchidun al decidè di bandonâ la imprese e di tornâ a cjase. Propit su di ché mont, ai 6 di Novembar – e jere une domenie – al sucedarà l'unic scuintri a fûc cuintri dai Austriacs. Di fat, vie pe gnot, une vuide dal puest e veve visât Andreuzzi che une compagnie di gjendarmis e sarès partide di Andreis par fâ un sorelûc su la mont Cjaval. Si decidè alore di cjapâ posizion par fermâju, viodude che la posizion che a tignivin e dominave la val, cetant plui favorevule di ché dai Austriacs, che a vevin di vigni sù pe mont, e contant anche su lis promessis vudis dal avocat Cella che la insurezion si podès slargiâ. Il combatiment al durà par plui di trê oris, e i Austriacs a forin fermâts par trê voltis, e cussi a scugnirin tomâ indaûr cui lôr muarts e ferîts, ben che de bande di Andreuzzi dome un di lôr al fo ferît. I Austriacs a fevelarin di 300 insorts; in realtât, chei che a vevin partecipât no jerin plui di une dozene, ma lis bombis al Orisini – fatis a Navarons – e i clapons fats rodolâ jù pe cleve de mont, a vevin fat un davoi di fâ pôre ai Austriacs. Stiçât dal sucès, Andreuzzi al varès volût cori daûr ai Austriacs e jentrâ di liberadôr



La lapide che e ricuarde lis impresis di Andreuzzi

a Andreis, ma i conseis dal plui realistic Tolazzi lu convincerin a desisti. Alore, si decidè di cjapâ la strade de fuide, che ju puartâ al fôs di Navalesc par une cengle, che ancjemò vuè e ven clamade la «cengle dai garibaldins». Cundut dal sucès, il tentatîf de insurezion al stave par finî. Daspò di une lungje marçe vie pes monts, la bande e rivave al fôs di Navedeit. Di là sù, i insorts a podevin viodi lis patulîs dai Austriacs, e il borc di Inglagne, anche chel incolm di gjendarmis. Contornâts di ogni bande, i oms di Andreuzzi a deciderin di bandonâ la imprese, disfant la bande. E jere une frede, ma bieles zornade ché dai 8 di Novembar dal 1864.

Roberto Iacovissi



RINTOCCHI ARMONICI



POZZO DI CODROIPO – Chiesa Parrocchiale

SABATO 4 MAGGIO 2024 - ore 20.30

BRASSMEN

Quintetto d'otoni

FLAIBANO – Centro sociale

VENERDÌ 10 MAGGIO - ore 20.30

Orchestra LEGATO ALLEGRO

Dirige Denis Bosa

RIVOLTO – Chiesa di San Michele Archangelo

DOMENICA 12 MAGGIO 2024 - ore 17.00

CORO di VOCI BIANCHE

Dirige il coro di voci bianche Chiara Grillo, al pianoforte Luca Fabbro

ALEX PITTONET

Chitarra

Ensemble LEGATO ALLEGRO

Dirige Denis Bosa

SAN ODORICO AL TAGLIAMENTO – Chiesa di Sant'Odorico

SABATO 18 MAGGIO - ore 20.30

BRASSMEN

Quintetto d'otoni

MUSCLETTO – Chiesa di Santo Stefano Protomartire

DOMENICA 26 MAGGIO - ore 17.00

GRUPPO SAX di Sedegliano

Dirige Angelo Di Giorgio

RIVE D'ARCANO – Piazza I Maggio

DOMENICA 26 MAGGIO - ore 17.00

ALEX PITTONET

Chitarra

Ensemble LEGATO ALLEGRO

Dirige Denis Bosa

BRASSMEN

Quintetto d'otoni